

Sij Fung Saenq Ndeu Hawj Daxboh

写给爸爸的一封信

武鸣县太平镇庆乐小学四年级 黄桢钰

Daxboh ndeigyaex gou:

Mwngz ndei! Duenh neix guh-hong nyaengq lwi? Yaek daengz cieng lo, daengx ranz vunz cungj caj mwngz dauqma itheij gwn donq haeux dox-comz ne. Deng lo, dingqnyi naeuz giz mwngz siethau mbinfoenfoen lo, daxboh mwngz aeu lai daenj buh raeuj ndang, gaej deng dwgliengz nw. Daxboh, daxmeh naeuz caj mwngz dauqma le, raeuz couh duk faengx, guh ceiz, gou geiq ndaej mwngz ceiq haengj gwn ceizngaeux lo.

Daxboh, lwnh mwngz nyi, aen singhiz neix gou camgya “angqcoux bi moq, cuengqmbin siengjmuengh” cozvwnz doxdax, ndaej youhsiuciengj bw, mwngz itdingh caeuq gou ityiengh haisim ba. Aen yozgiz neix, gou vanzlij

camgya govwnz langjduz doxdax, moix ngoenz cuengqhag le, gou cungj ciuqgingq lienh doegsaw, roengzrengz dawz moix cih saw doeg ndaej cinj, dawz biujcingz lienh ndaej engq fungfouq. Goengfou mbouj vi boux miz sim, gou ndaejdaengz ngeihdaengj-ciengj lo.

Daxboh, yenzdan ngoenzhaenx, miz gyoengq daeggo dahcej Nanzningz Si Denhdauz Szyen Yozyau he daeuj hagdangz dou caeuq gyoengqdou gyau baengzyoux. Gou gig miz fuk, roxnaj dah cej ndeu, de gangjvah gig ndei dingq, de soengq aen soujbyauj gyaugetget ndeu hawj gou, vanzlij soengq haj bonj sawgovai hawj gou dem, dah cej neix naeuz, daengz cuengqgyaj le yaek daiq gou youz

Nanzningz, caen dwg angq lai lo.

Daxboh, gou laeglemx naeuz mwngz nyi, daxmeh ndaej gya ngaenzhong lo, ndaw ranz cawx aen densi moq ndeu lo, ndaw ranz miz song aen densigih, daengz gvaqcieng mwngz dauqma, gou couh mbouj yungh caeuq mwngz doxceng yawj densi lo. Daxboh, duenh neix daeg-nuengx ndangdaej haemq coekcangq, mbouj bingh geijlai lo, fajnaj bizboedboed luenzlili, dwggyaex dangqmaz. Goengda ndangdaej lij cangq, lij ndaej bang daxmeh guh di hong. Dienheiq nit le, song cik ga daxbuz youh dot lo, mboujgvaq mwngz gaej yousim, daxmeh ngoenzngoenz cungj oenq yw hawj daxbuz cimq din. Gou gingciengz bang daxbuz raix



raemx cimq din, mwngz couh cuengq-sim ba.

Daxboh, yaek geizgauj lo, seiz-neix gyoengqdou fuzsiz gig gaenjieng, gou itdingh aeu ndeindei fuzsiz gunghgo, ceng' aeu gaujsi ndaej engq ndei cingzci, mbouj hawj mwngz saetmuengh.

Doeklaeng, gingqhoh daxboh ndangdaej coekcangq, gunghcoz swnh-leih!

Dahlwgsau mwngz: Vangz Cwnhyi
2015 nienz 1 nyied 8 hauh
(指导老师: 韦春明 黄春菊)



Boq Bop

吹泡泡

环江思恩镇人和小学二年级 莫国辉

Ngoenzneix, gou boux dog gag youq ranz, roxninh gig mbwq, couh siengj boq bop daeuj guhcaemz.

Gangj guh couh guh, gou dawz aen bingz ndeu daeuj, cuengq raemxgenj roengz bingz bae, caiq aeu diuz gyongjiq ndeu daeuj. Gou sien aeu gyongjiq caemj roengz bingz raemxgenj bae, dawz hwnj caiq menhmenh boq, couh boq ok aenbop hunghung iqi, mwngz yawj, lij miz aenbop “songseng” dem bw! Gou angq dwk diuq hwnjdaej. Haujlai aenbop comz youq henz ndang gou, gij aenbop neix youq laj ndit ciuq bienq baenz hoengzhoengz heuheu, gyoengqde humx youq henz ndang gou lumj dabsien sanq va nei mbin hwnj mbin roengz, mbin swix mbin gvaz. Gou youq ndaw seiqgyaiq aenbop, roxninh swheij couh lumjbaenz aen bop gyaundeix ndeu, yaep ndeu mbin youq gwnz fwjhau, yaep ndeu youq ndaw ndoengfaex guhcaemz. Gou mbin gvaq dah gvangq, mbin gvaq bya sang, mbin daengz Baekging, caeuq lwngyez Baek-ging guh baengzyoux……

Gij bop gou gag guh gag boq okdaej neix, hawj gou angqyangz dohgvaq ngoenz ndeu.

(指导老师: 覃玉往)

Ngeihcib Bi Le Caiq Doxraen

二十年后再相会

环江思恩镇西南小学 韦海椰

Miz ngoenz ndeu, boux doengzhag siujyoz ndeu dwk dienhvah daeuj naeuz, ngoenzcog doengzhag siujyoz youq mbanjranz doxcomz. Gou itcig youq dieggyae guhhong, ngeihcib bi mbouj ma ranz lo, dwg wnggai ma yawjyawj lo.

Gou hai aen feihgih gou mbin ma daengz mbanjranz, yawjraen gyoengq doengzhag siujyoz cungj daeuj lo, daihgya comz youq giz ndeu mbouj yungzheih, gojyij gangj haujlai vah lo.

Miz aen ci ndeu hai haeuj-daeuj, boux roengz ci haenx mbouj dwg Siujveih ma? Yah, lij caen dwg de!

“Mwngz gig miznaj ha, duenh

seizgan neix nyaengq gijmaz?”

“Gou ya.” De dap naeuz: “Gou hai ranz camcaz simleix ndeu, bang bouxwnq, hix bang swheij ha.” Cingq gangj dwk, miz vunz heuh gou, dwg bouxlawz ne? “Lauz doengzhag, mbouj geiq ndaej la, gou dwg Siujsw.” “O, gou yaek lumz bae lo, mwngz seizneix guh gijmaz ne?” “Gou dwg sezgiswh, gou lij ndaej gvaq haujlai ciengj ne?” Siujsw gigmiznaj gangj.

Neix mbouj dwg Lij lauxsae ha? De dwg siujyoz banhcujyin dou. De bienq laux lo, danhseih gij riunyumj de lij lumj gaxgonq ityiengh. “Siujyingh ha, neix dwg cozyez siujyoz mwngz, gou lij bang

mwngz louz bw. Mwngz seizneix dwg boux canghyw mizmingz ndeu lo, mbouj ndaej dasang, aeu ndeindei vih bouxbingh yw bingh bw!”

“Gyoengq doengzhag, daihgya lij geiq ndaej lwi, siujyoz bizyez seiz, Lij lauxsae ok diuz daez cozvwnz haenx dwg gijmaz?” “Geiq ndaej.” Daihgya itheij dap naeuz: “Neihcib bi le caiq doxraen.”

Ngeihcib bi le caiq doxraen, gyoengq doengzhag bouxboux cungj gig angq, yaek doxbiek lo, daihgya cungj sij mbouj ndaej lizhai!

(指导老师: 罗少维)



Dennauj Gag Gangj

电脑自述

环江思恩镇西南小学六年级 罗金将

gou; aensieng cangzfanghdij dwg ukgyaeuj gou, gyoengqvunz heuh de guh cujgih; aen genbuenz youh raez youh benj haenx dwg din gou. Gij goengnaengz gou gig lai! Mwh guhhong, bouxcawj yungh gou daeuj ra swliu, sij faenzcieng, geiq saenq……Mwh yietnaiq, bouxcawj yungh gou daeuj guh youzhi, dingq go, veh dozveh, hwnj QQ gangjgoj……Gou hawj bouxcawj daiqdaej haujlai vaiqvued. Bouxcawj hix gig gyaex gou, moix baez yungh gou seiz, cungj dwg siujsim dwk daenq gij fwngz gou diemj aennaj gou, miz seiz yungh

fwngz youq gwnz din gou diemj bae diemj dauq dajcih. De lij ciengzciengz yungh sujbaq mad ndang gou, bang gou mad faenx, hawj gou seuqcingh! Hoeng gou hix miz vunzdig, neix couhdwg binghdoeg. Vihneix, bouxcawj an faq ciengz redoeg ndeu hawj gou, lij ciuqseiz bang gou gaj doeg, neix hawj gyoengq binghdoeg siengj buqvaih gou haenx mbouj gamj gyawj gou lo.

Sou gangj, gou dwg mbouj dwg gig ndei ne? Sou gyaex gou lwi?

(指导老师: 罗凤)